

**Bosna i Hercegovina**  
**Federacija Bosne i Hercegovine**  
**Tuzlanski kanton**  
**Grad Tuzla**  
**Služba za kulturu, sport, mlade**  
**i socijalnu zaštitu**  
Broj: 17-11-6494/2026  
Tuzla. 4.5.2026. godine

Na osnovu člana 5. Pravilnika o kriterijima i postupku raspodjele sredstava iz Budžeta Grada Tuzle sa pozicija za podršku manifestacija iz oblasti kulture i sporta („Službeni glasnik Grada Tuzle“, broj: 5/26) i Programa utroška sredstava iz Budžeta Grada Tuzle za 2026. godinu sa pozicija za podršku realizaciji manifestacija iz oblasti kulture i sporta, broj: 17-176/26 od 30.4.2026. godine, Služba za kulturu, sport, mlade i socijalnu zaštitu Grada Tuzla, dana 4.5.2026. godine, objavljuje

**JAVNI POZIV**  
**za dodjelu sredstava iz Budžeta Grada Tuzle za 2026. godinu sa pozicija za**  
**podršku realizaciji manifestacija iz oblasti kulture i sporta**

**I - Predmet javnog poziva**

Predmet javnog poziva je dodjela sredstava iz Budžeta Grada Tuzle za 2026. godinu namijenjenih za (su)finansiranje manifestacija iz oblasti kulture, manifestacija iz oblasti sporta i manifestacija iz oblasti kulture koje će biti uvrštene u program kulturne manifestacije „Ljeto u Tuzli“. Namjenska sredstva planirana su na pozicijama:

1. „Transferi za kulturne manifestacije“ – 170.000,00 KM
2. „Transferi za sportske manifestacije“ – 120.000,00 KM
3. Transferi za realizaciju kulturne manifestacije „Ljeto u Tuzli“ – 50.000,00 KM

Sredstva sa pozicija „Transferi za kulturne manifestacije“ i Transferi za realizaciju kulturne manifestacije „Ljeto u Tuzli“ dodijeljuju se neprofitnim organizacijama u svrhu (su)sufinansiranja realizacije manifestacija iz oblasti kulture i manifestacija koje će biti uvrštene u program kulturne manifestacije „Ljeto u Tuzli“ u sljedećim prioritnim oblastima:

- a) pozorišna djelatnost, scensko stvaralaštvo i interpretacija,
- b) muzičko stvaralaštvo i interpretacija i muzičko – scenske umjetnosti,
- c) filmska umjetnost i audio – vizuelno stvaralaštvo,
- d) likovna umjetnost i izložbena/galerijska djelatnost,
- e) primijenjena i vizuelna umjetnost, dizajn i umjetnička fotografija,
- f) digitalno stvaralaštvo i multimedija,
- g) izdavačka djelatnost, promocije knjiga i časopisa iz oblasti kulture, nauke i drugih društvenih djelatnosti,
- h) promocija ravnopravnosti spolova i prava marginaliziranih grupa putem umjetničkih djelatnosti kulture,
- i) kulturno – umjetnički amaterizam koji doprinosi afirmaciji kulturnih vrijednosti i savremenog kulturno – umjetničkog stvaralaštva na području grada Tuzle,
- j) arhivska, muzejska i bibliotečka djelatnost,
- k) kulturno-vjerski događaji,
- l) podsticanje regionalne i međunarodne saradnje u oblasti kulture,
- m) ostala muzička, govorna, artistska i scenska izvođenja programa u oblasti kulture,
- n) ostali značajni događaji iz oblasti društvenih djelatnosti.

Sredstva s pozicije „Transferi za sportske manifestacije“ dodijeljuju se neprofitnim organizacijama u svrhu (su)finansiranja realizacije manifestacija iz oblasti sporta u sljedećim prioritnim oblastima:

- a) domaća i međunarodna takmičenja u oblasti sporta koja se realizuju na području grada Tuzle,
- b) međunarodne sportske manifestacije i takmičenja koja promovisu grad Tuzlu u zemlji i inostranstvu,
- c) sportska takmičenja djece, mladih i osoba s invaliditetom,
- d) podsticanje regionalne i međunarodne saradnje u oblasti sporta,

- e) afirmacija i razvoj kvalitetnog i vrhunskog sporta,
- f) sportsko-rekreativne aktivnosti u cilju očuvanja zdravlja,
- g) promocija sporta i njegovih vrijednosti od značaja za lokalnu zajednicu.

## **II - Pravo učešća**

Pravo na dodjelu sredstava, u skladu sa planiranim i raspoloživim iznosima na namjenskim pozicijama u Budžetu Grada Tuzle, mogu ostvariti neprofitne organizacije (udruženja i fondacije) sa sjedištem na području grada Tuzle (u daljem tekstu: aplikanti) koje ispunjavaju sljedeće opće uslove:

- a) da su osnovane i registrovane u skladu sa važećim zakonskim propisima u Bosni i Hercegovini,
- b) da im je registrovana djelatnost u skladu sa prioritetnom oblasti u okviru koje predlažu manifestaciju,
- c) da ne obavljaju aktivnosti u ime političkih organizacija,
- d) da predložene manifestacije realizuju na području grada Tuzle.

Iznimno, sredstva za (su)finansiranje manifestacija iz oblasti kulture i manifestacija iz oblasti sporta mogu se dodijeliti i neprofitnim organizacijama koje nemaju registrovano sjedište na području grada Tuzle ili za manifestaciju koja se realizuje izvan područja grada Tuzle, u slučaju ako je implementacija predložene manifestacije od interesa za grad Tuzlu, što će se cijeliti u svakom pojedinačnom slučaju.

Sredstva za (su)finansiranje manifestacija iz oblasti kulture koje će biti uvrštene u program kulturne manifestacije „Ljeto u Tuzli“ iznimno se mogu dodijeliti i neprofitnim organizacijama koje nemaju registrovano sjedište na području grada Tuzle pod uslovom da se predložena manifestacija realizuje na području grada Tuzle i da je od interesa za grad Tuzlu, što će se cijeliti u svakom pojedinačnom slučaju.

## **III – Prijava na Javni poziv**

Prijava na javni poziv podnosi se na propisanom prijavnom obrascu koji je objavljen u prilogu ovog Javnog poziva na službenoj internet stranici Grada Tuzle ([grad.tuzla.ba](http://grad.tuzla.ba)). Prijavni obrazac potrebno je elektronski, potpuno i sadržajno popuniti a obavezno sadrži:

- a) podatke o aplikantu,
- b) podatke o manifestaciji (naziv i opis uz naznaku ukoliko je manifestacija tradicionalna odnosno ukoliko je već finansirana sredstvima iz Budžeta Grada Tuzle; ciljevi, aktivnosti i očekivani rezultati; ciljne grupe; značaj manifestacije za lokalnu zajednicu),
- c) opisni izvještaj o manifestacijama realizovanim u prethodne četiri (4) godine.

Uz popunjen prijavni obrazac aplikanti su obavezni dostaviti sljedeću dokumentaciju:

- a) detaljno razrađen finansijski plan za realizaciju manifestacije na propisanom obrascu za budžet, elektronski popunjenom i potpisanom od strane odgovorne osobe aplikanta,
- b) rješenje o upisu u registar udruženja kod nadležnog ministarstva (fotokopija osnovnog rješenja o upisu i rješenja o upisu promjena),
- c) izvod iz registra udruženja koji nije stariji od šest (6) mjeseci od dana objave javnog poziva (original ili ovjerena fotokopija),
- d) identifikacioni broj (fotokopija),
- e) uvjerenje o izmirenim obavezama prema javnim prihodima (uvjerenje nadležne porezne uprave koje nije starije od 30 dana od dana objave javnog poziva – original ili ovjerena fotokopija),
- f) završni godišnji finansijski izvještaj za prethodnu godinu sa pečatom AFIP-a (bilans stanja i izvještaj o prihodima i rashodima – fotokopija),
- g) uvjerenje o članstvu u Sportskom savezu Grada Tuzle za aplikante koji prijavljuju manifestaciju u oblasti sporta (nije eliminatorno ali se dodatno boduje),
- h) podaci o stručnosti osoba koje će biti angažovane na realizaciji manifestacije (kraći CV) i
- i) zvaničan dokument banke o transakcijskom računu aplikanta (fotokopija).

Za dodjelu sredstava sa pozicija „Transferi za kulturne manifestacije“ i „Transferi za sportske manifestacije“ jedan aplikant može podnijeti jednu (1) prijavu za manifestaciju iz oblasti kulture ili manifestaciju iz oblasti sporta koja se održava u toku tekuće godine. U slučaju da aplikant podnese više od jedne prijave u razmatranje će biti uzeta samo prijava koja je prva zaprimljena.

Za dodjelu sredstava sa pozicije Transferi za realizaciju kulturne manifestacije „Ljeto u Tuzli“ jedan aplikant može podnijeti jednu (1) prijavu za manifestaciju iz oblasti kulture koja se održava u periodu

od 1. juna do 30. septembra 2026. godine. U slučaju da aplikant podnese više od jedne prijave u razmatranje će biti uzeta samo prijava koja je prva zaprimljena.

Nepotpuna dokumentacija i dokumentacija dostavljena izvan predviđenog roka, neće se uzeti u razmatranje. Neće se uzeti u razmatranje ni prijave aplikantata:

- a) koji nisu izvršili svoje obaveze u vezi sa ranije doznačenim finansijskim sredstvima iz Budžeta Grada Tuzle,
- b) u kojima aktivnosti manifestacije nisu definisane u skladu sa utvrđenim prioriternim oblastima,
- c) u kojima su administrativni troškovi predviđeni u iznosu većem od 30% od ukupnog iznosa za manifestaciju koji se potražuje od Grada Tuzle,
- d) koji nisu izmirili obaveze prema javnim prihodima,
- e) koje su bazirane na finansiranju redovnih aktivnosti podnosioca prijave,
- f) koje su bazirane na kupovini opreme ili štampanju promotivnog materijala,
- g) čiji je rad usmjeren na političke aktivnosti,
- h) koje su namjenjene za isključivu dobit pojedinca, individualna sponzorstva za učestvovanje u radionicama, seminarima, konferencijama, kongresima, trening kursovima i sl.,
- i) koje sadrže aktivnosti i troškove koji su u toku tekuće godine već podržane sredstvima sa drugih pozicija iz Budžeta Grada Tuzle.

#### **IV - Osnovni kriteriji odabira i iznosi sredstava za dodjelu**

Osnovni kriteriji odabira određeni su Pravilnikom o kriterijima i postupku raspodjele finansijskih sredstava iz Budžeta Grada Tuzle sa pozicija za podrška realizaciji manifestacija iz oblasti kulture i sporta („Službeni glasnik Grada Tuzle“, broj: 5/26) i Programom utroška sredstava iz Budžeta Grada Tuzle za 2026. godinu sa pozicija za podrška realizaciji manifestacija iz oblasti kulture i sporta, broj: 17-176/26 od 30.4.2026. godine. Postupak po javnom pozivu, u skladu sa odredbama prethodno pomenutog Pravilnika i Programa utroška sredstava, provodi Komisija za ocjenjivanje i odabir aplikacija (u daljem tekstu: Komisija) sastavljena od tri člana iz reda uposlenika Gradske uprave Tuzla, koju rješenjem imenuje Pomoćnik gradonačelnika za nadležnu Službu.

Minimalan iznos sredstava za dodjelu po jednoj aplikaciji za manifestacije iz oblasti kulture i manifestacije iz oblasti sporta je 800,00 a maksimalan 7.000,00 KM. Visina sredstva za dodjelu će se određivati u skladu sa utvrđenim brojem bodova za manifestaciju prema sljedećem okvirnom rasponu:

<b>Broj bodova</b>	<b>Iznos sredstava za dodjelu (KM)</b>
36 - 39	800,00 - 1.000,00
40 - 43	1.000,00 - 2.000,00
44 - 47	2.000,00 - 3.000,00
48 - 51	3.000,00 - 4.000,00
52 - 55	4.000,00 - 5.000,00
56 - 60	5.000,00 - 7.000,00

Minimalan iznos sredstava za dodjelu po jednoj aplikaciji za manifestacije iz oblasti kulture koje se kandiduju za uvrštavanje u program kulturne manifestacije „Ljeto u Tuzli“ za 2026. godinu je 800,00 a maksimalan 3.000,00 KM. Visina sredstva za dodjelu će se određivati u skladu sa utvrđenim brojem bodova za manifestaciju prema sljedećem okvirnom rasponu:

<b>Broj bodova</b>	<b>Iznos sredstava za dodjelu (KM)</b>
36 - 40	800,00 - 1.000,00
41 - 45	1.000,00 - 1.500,00
46 - 50	1.500,00 - 2.000,00
51 - 55	2.000,00 - 2.500,00
56 - 60	2.500,00 - 3.000,00

Visina sredstava za dodjelu bit će cijenjena u svakom pojedinačnom slučaju uzimajući u obzir ukupnu vrijednost predložene manifestacije i traženi iznos sredstava iz Budžeta Grada Tuzle. Sredstva u maksimalnom iznosu mogu se dodijeliti u izuzetnim slučajevima, za podršku tradicionalnih manifestacija koje se ističu kvalitetom programa, okupljaju veliki broj učesnika i posjetilaca i značajno doprinose promociji grada Tuzle u zemlji i regionu.

#### **IV – Namjena sredstava za dodjelu**

Iz odobrenih budžetskih sredstva aplikanti mogu finansirati administrativne troškove i troškove za realizaciju aktivnosti u okviru predložene manifestacije koji su nastali u toku tekuće godine. Pod administrativnim troškovima podrazumijevaju se troškovi operativnog osoblja angažovanog na koordinaciji i realizaciji manifestacije i kancelarijski troškovi. Troškovi manifestacije obuhvataju troškove za realizaciju planiranih aktivnosti u skladu sa predloženim budžetom manifestacije. Administrativni troškovi (troškovi osoblja i kancelarijski troškovi) ne smiju prelaziti 30% vrijednosti manifestacije u iznosu koji se potražuje od Grada Tuzle. Od ukupno odobrenih sredstava za (su)finansiranje manifestacije iz Budžeta Grada Tuzle priznaće se maksimalno do 30% za navedene troškove.

#### **VI – Mjesto i rok dostave prijava na javni poziv**

Prijave na javni poziv sa pratećom dokumentacijom aplikanti dostavljaju u zatvorenoj koverti preporučenom poštom ili predaju lično u Centar za pružanje usluga građanima (šalter sala) u zgradi Gradske uprave na adresu:

**GRAD TUZLA**  
**Služba za kulturu, sport, mlade i socijalnu zaštitu**  
**Ulica ZAVNOBiH-a broj 11**  
**75000 Tuzla**

**sa naznakom „Javni poziv za dodjelu sredstava iz Budžeta Grada Tuzle za 2026. godinu sa pozicija za podršku realizaciji manifestacija iz oblasti kulture i sporta“**  
**„Ne otvarati prije zvaničnog otvaranja“**

Javni poziv je otvoren 15 dana od dana objavljivanja, a krajnji **rok za predaju aplikacija je 19.5.2026. godine**. Aplikacije koje budu pristigle poslije navedenog roka bit će razmatrane jedino u slučaju da poštanski žig ukazuje na datum slanja prije zvaničnog isteka roka. Aplikacije poslane na bilo koji drugi način (npr. faksom ili e-mailom) neće biti uzete u razmatranje. Vanjska strana koverta mora sadržavati naziv i adresu aplikanta te naziv transfera za koji se podnosi prijava („Transferi za kulturne manifestacije“, „Transferi za sportske manifestacije“ ili „Transferi za realizaciju kulturne manifestacije „Ljeto u Tuzli““).

#### **VII - Način objavljivanja rezultata i dodatne informacije**

Nakon završenog postupka odabira na službenoj internet stranici Grada Tuzle ([grad.tuzla.ba](http://grad.tuzla.ba)) bit će objavljena Lista o odabiru aplikacija koja će sadržavati odabrane aplikante kao i aplikante koji nisu ispunili uslove javnog poziva sa naznakom koji uslov nije ispunjen. Informativni sastanak *Dan otvorenih vrata* za sve zainteresovane aplikante bit će održan 8.5.2026. godine sa početkom u 10.00 sati u prostorijama Gradske uprave Tuzla (ZAVNOBiH-a 11) u sali u prizemlju. Potencijalni aplikanti će tokom sastanka biti detaljnije upoznati sa načinom prijavljivanja, popunjavanja prijavnih obrazaca, kriterijima i ostalim pitanjima značajnim za pravilno apliciranje na Javni poziv.

Sve dodatne informacije o načinu i postupku prijave na Javni poziv mogu se dobiti u Službi za kulturu, sport, mlade i socijalnu zaštitu Grada Tuzle, putem telefona: 035/307-327 te slanjem pitanja na e-mail adresu: [asja@tuzla.ba](mailto:asja@tuzla.ba), sa naznakom „Javni poziv – podrška realizaciji manifestacija iz oblasti kulture i sporta“.

**Napomena:** Riječi i pojmovi koji imaju rodno značenje, bez obzira jesu li u ovom dokumentu korišteni u muškom ili ženskom rodu, odnose se na jednak način na muški i ženski rod.

**Služba za kulturu, sport, mlade  
i socijalnu zaštitu**